


# Media Massa dan Etika Maklumat: Menjaga Integriti di Era Baru

Oleh Kumpulan 7

## Media Massa: Pintu Masuk ke Era Informasi

Dalam era globalisasi dan teknologi maklumat yang semakin maju, media massa telah menjadi satu komponen yang tidak dapat dipisahkan dari kehidupan harian kita. Media massa merangkumi surat khabar, televisyen, radio dan platform digital dan berfungsi sebagai saluran utama untuk penyebaran maklumat dan komunikasi. Media massa bukan sahaja berperanan dalam menyampaikan berita terkini, bahkan juga memainkan peranan penting dalam membentuk pandangan dan sikap masyarakat terhadap isu-isu sosial, politik, dan ekonomi. Dengan pengaruh yang meluas, media massa mampu mencorakkan cara kita berfikir, bertindak, dan berinteraksi dengan dunia sekeliling. Kami akan membincangkan betapa pentingnya peranan media massa dalam pelbagai aspek kehidupan termasuk penyebaran maklumat, pendidikan, penglibatan sosial serta pembentukan pendapat awam.



## Cabaran Media Massa di Era Moden



Pada masa kini, media massa merupakan perantara yang sangat popular digunakan oleh masyarakat. Contohnya, media massa elektronik seperti internet merupakan media yang terpenting dan kebanyakan masyarakat tidak mampu hidup tanpanya. Tidak dapat dinafikan bahawa internet banyak memberi kebaikan terhadap masyarakat, tetapi ia juga datang seiring dengan cabaran yang perlu dihadapi. Cabaran-cabaran ini perlulah dikenal pasti agar ianya tidak membawa mudarat kepada diri sendiri. Persoalannya, apakah contoh cabaran media massa?

Antara contoh cabaran media massa ialah penyalahgunaan internet sebagai pusat perjudiaan. Sebagai contoh, permainan video yang berorientasikan judi telah mendapat perhatian di kalangan orang dewasa dan remaja. Kegiatan ini perlulah dibendung agar ianya tidak berleluasa sehingga boleh merosakkan nilai-nilai moral yang baik dalam diri masyarakat.

Selain itu, cabaran yang wujud ialah mengenai kesahihan maklumat. Maklumat yang sahih dan benar amat penting untuk berada di dalam internet. Hal ini berupaya untuk mengelakkan daripada penyelewengan dan penyebaran fakta berita yang palsu. Sebagai contoh, di dalam bidang perniagaan, sesuatu produk atau barang yang hendak dijual melalui media sosial perlulah sahih dan benar supaya maklumat yang disampaikan akan memberi gambaran yang positif kepada pengguna.

Kesimpulannya, cabaran-cabaran ini banyak memberikan kesan yang negatif terhadap masyarakat. Oleh itu, kita perlulah cakna akan halangan tersebut dan mengambil langkah proaktif untuk mengelakkan diri daripada terjerumus dengan halangan-halangan tersebut.

## Mengupas Peranan dan Kepentingan Media Massa Hari Ini

Media massa merupakan medium yang penting dan sering digunakan dalam era moden ini. Setiap masyarakat perlulah bijak dan menjaga etika ketika menggunakan media massa. Seperti yang diketahui, media massa sering kali digunakan dalam masyarakat untuk menyebarkan sesuatu maklumat sama ada di Facebook mahupun Twitter. Setiap individu yang menyebarkan maklumat perlulah berhati-hati ketika menyebarkan maklumat peribadi supaya dapat mengelakkan maklumat peribadi daripada digunakan untuk tujuan penipuan. Masyarakat juga seharusnya tidak menyebarkan maklumat palsu di media massa miliknya agar tidak menimbulkan kerusuhan awam. Selain itu, media massa juga berperanan penting dalam pendidikan kerana ia sering digunakan untuk pelajar atau mahasiswa sebagai medium untuk segala keilmuan. Pelajar dapat menggunakannya untuk mencari bahan-bahan rujukan untuk pendidikan. Seterusnya, masyarakat dapat melibatkan diri dalam kegiatan sosial seperti berkongsi pendapat dan berinteraksi dengan individu di seluruh dunia hanya dengan menggunakan media massa. Namun, ianya penting untuk seseorang untuk menjaga pertuturan bahasa semasa berinteraksi agar masyarakat kekal harmoni. Media massa juga merupakan alat yang penting untuk menyebarkan pendapat awam seperti debat. Ia dapat memberikan setiap individu untuk bebas bersuara mengenai pandangan dalam berbagai perspektif. Masyarakat perlulah elakkan daripada melibatkan isu sensitif ketika menyuarakan pendapat mereka di media massa agar tidak menyebabkan keributan dalam sesebuah negara.



## Etika dan Tanggungjawab dalam Penggunaan Media Massa

Salah satu prinsip yang perlu diikuti oleh pihak media bagi mewujudkan penggunaan media massa yang beretika adalah menyajikan maklumat yang benar dan sahih. Wartawan dan penyunting perlu memastikan isi kandungan yang bakal disiarkan dan disebarkan adalah tepat. Mereka perlu menggunakan sumber yang boleh dipercayai serta memberi klarifikasi terhadap berita yang belum jelas. Penyebaran maklumat melalui media massa yang tidak tepat boleh menyebabkan kekeliruan, salah faham, dan kerosakan.

Sehubungan dengan itu, media massa harus menghormati privasi individu dan hak asasi manusia. Penyiaran berita atau media yang melibatkan kehidupan dan maklumat peribadi seseorang harus dilakukan dengan hati-hati dan mendapatkan izin dan persetujuan individu tersebut. Ini termasuklah dengan privasi mangsa jenayah, terutama yang melibatkan isu sensitif dan boleh memberi impak yang negatif kepada individu terlibat.

Pihak media juga perlu mengikuti undang-undang dan peraturan yang dijelaskan oleh pihak berkuasa dan badan pengawas penyiaran seperti Suruhanjaya Komunikasi dan Multimedia Malaysia (SKMM). Wartawan harus mengetahui dan memahami undang-undang yang berkaitan dengan profesion mereka dan memastikan bahawa setiap tindakan mereka tidak melanggar undang-undang tersebut. Sebagai contoh, terdapat Akta Perlindungan Data Peribadi 2010 yang melindungi hak privasi individu dengan mengatur cara data peribadi dikumpul, disimpan, dan digunakan. Media massa perlu memastikan mereka mematuhi akta ini ketika mengendalikan data peribadi sumber atau subjek berita. Pihak media dapat membina kepercayaan dan kredibiliti mereka di mata masyarakat sekiranya mereka berpegang teguh kepada undang-undang media.

## Menilai Kesan Media Massa dalam Kehidupan Harian Kita

Media massa membawa banyak manfaat kepada masyarakat tapi juga mempunyai beberapa kesan negatif yang perlu diberi perhatian. Akhbar ini akan membincangkan kesan positif dan kesan negatif media massa terhadap masyarakat.

Salah satu kesan positif utama media massa ialah penyebaran maklumat dan pendidikan. Media massa dapat menyalurkan maklumat dengan pantas dan meluas, membolehkan semua lapisan masyarakat mendapat akses kepada berita terkini dan pengetahuan dari seluruh dunia. Ini bukan sahaja membantu dalam meningkatkan kesedaran masyarakat tentang isu-isu global tetapi juga menyumbang kepada pendidikan awam. Sebagai contoh, ketika pandemik COVID-19, media massa memainkan peranan penting dalam menyebarkan maklumat tentang langkah-langkah pencegahan dan mengemaskini mengenai perkembangan virus tersebut.

Selain itu, media massa juga menggalakkan penglibatan sosial dan politik dalam kalangan masyarakat. Media massa membolehkan rakyat memahami dan mengambil bahagian dalam proses demokrasi dengan melaporkan isu-isu sosial, politik, dan ekonomi. Contohnya, media massa akan menyebarkan informasi isu-isu penting seperti menyertai perbincangan awam, mengundi, dan mengambil bahagian dalam aktiviti-aktiviti politik. Media sosial juga membolehkan rakyat menyuarakan pendapat mereka dengan lebih bebas dan berhubung dengan pemimpin politik dan aktivis.

Walaupun media massa dapat menyebarkan maklumat yang berguna, tetapi juga boleh menjadi saluran untuk penyebaran maklumat palsu dan propaganda. Berita palsu atau "fake news" boleh menyebabkan kekeliruan dan panik dalam kalangan masyarakat. Selain itu, propaganda yang disebarkan melalui media massa boleh memanipulasi pandangan masyarakat dan membawa kepada ketegangan sosial dan politik. Sebagai contoh, maklumat palsu mengenai vaksin COVID-19 telah menyebabkan ketidakpercayaan terhadap vaksin dan merosakkan usaha kesihatan awam.

Media massa juga boleh memberi kesan negatif terhadap kesihatan mental. Pendedahan berterusan kepada berita negatif dan kandungan yang mencetuskan kebimbangan boleh menyebabkan tekanan dan kegelisahan. Selain itu, media sosial sering mempromosikan imej tubuh yang tidak realistik dan gaya hidup yang sempurna, yang boleh menyebabkan rasa rendah diri dan masalah kesihatan mental seperti kemurungan. Kajian menunjukkan bahawa penggunaan media sosial yang berlebihan boleh membawa kepada perasaan kesunyian dan isolasi.

Media massa mempunyai kesan yang mendalam terhadap masyarakat. Media massa dapat menyebarkan maklumat dan mendidik masyarakat, serta menggalakkan penglibatan sosial dan politik. Namun, media massa juga boleh menyebarkan maklumat palsu dan propaganda, serta memberi kesan negatif terhadap kesihatan mental.



## Kesimpulan

Kesimpulannya, media sosial telah merevolusi cara kita berkomunikasi dan menyebarkan maklumat. Media massa telah membawa pelbagai manfaat seperti kemudahan komunikasi, peluang ekonomi, dan meningkatkan kesedaran masyarakat. Namun, media sosial juga mempunyai kesan negatif termasuk ketagihan, ancaman privasi dan isu kesihatan mental. Oleh itu, penggunaan media sosial yang bijak adalah penting termasuk mengawal masa menggunakannya, melindungi privasi dan memastikan maklumat yang diterima adalah sahih. Cabaran utama seperti penyebaran maklumat palsu dan keselamatan siber memerlukan pendekatan yang berhati-hati. Dengan pengurusan yang betul, kita dapat memanfaatkan sepenuhnya potensi media sosial sambil mengurangkan risikonya. Bak kata pepatah, menyelam sambil minum air. Pendekatan yang bertanggungjawab dan kesedaran terhadap kesan psikologi ialah kunci utama untuk penggunaan media massa yang berkesan dan selamat.


## Ahli Kumpulan 7



**Lee Yin Shen**



**Choh Jing Yi**



**Neo Li Xin**



**Nabil Aflah Boo binti  
Mohd Yosuf Boo Yong  
Chong**



**Najma Shakirah binti  
Shahrulzaman**



**Yasmin Batrisyia binti  
Zahiruddin**